

21. august 2015.

UKA 2015/71

Inatsisartut suleriaasiat § 33 naapertorlugu aalajangiiffigisassatut siunnersuut imaattoq matumuuna saqqummiuppa:

**Siunnersuut uunga: Namminersorlutik Oqartussat pigisaannik sillimmasiisarfimmik pilersitsinerup iluaqutissartai aammalu aporfissarisinnaasaasa misissorneqarnissaanik, ilanngullugu pilersitsinerup suut piunasaqaatitariumaagai, soorlu aningaasartuutissat aammalu sulisussat pillugit Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq, Anthon Frederiksen, Partii Naleraq).

#### **Tungavilersuut:**

Ukiorpassuannqulersuni naalakkersuinikkut eqqartorneqartuarpoq, aningaasat ilami aningaasarpassuit nunatsinni annerusumik kaaviiartinnagit sulisinnagillu nunatsinniit avammut aniatinnartakkatta qanoq iliornikkut nunatsinnut iluaqutaanerusumik aqqiivigineqarsinnaanerit.

Apeqquteqaat § 37 naapertorlugu nr. 2015-17-imut akissut najoqqutaralugu Namminersorlutik Oqartussat 2014-imi 32,5 mio. kr. sillimmasiinermit atorsimavaat kiisalu ilanngullugu Namminersorlutik Oqartussat suliffeqarfiutaasa sillimmaserinerinut, apeqquteqaat § 37 naapertorlugu nr. 2015-98-imut akissummit erserpoq ukioq taanna 34,9 mio. kr. atorneqarsimasut.

Kommuneni namminersortunilu sillimmasiinermit aningaasat arlariinnik millionilikkaat tungaanut atorneqartartut ilimagineqarpoq, taamaamat kalaallit nunaata ukiumut sillimmasiinermit atortagai 100 mio. kr.-it sinnersimassagai nalilerneqarsinnaavoq.

Partii Naleqqami isumaqarpugut sillimmasiisarfimmik Namminersorlutik Oqartussat pitaassagaluarpata aningaasaqarneq iluaquserneqassasoq, aningaasat nunatsinniit aniaannartussaagaluit uninngatiinnarneqarsinnaasut.

Partii Naleqqamiit ilisimavarput illoqarfinni assigiinngitsuni sillimasiisarfiit avataaneersut immikkoortortaqarfiliorsimasut, paasinartumik – minnerunngitsumik Namminersorlutik Oqartussat aammalu Namminersorlutik Oqartussat suliffeqarfiutaasa sillimasiinermut aningaasat atortagaat eqqarsaatigalugit.

Partii Naleqqami qularutiginnilarput sillamasiisarfimmik Namminersorlutik Oqartussat pigisaannik pilersitsineq kalaallinut inuiannut iluaqutaasinnaasoq, aammalu nunap aningaasaqarneranut.

Taamaammat siunnersuutigaarput Naalakkersuisut peqquneqassasut qulaani misissuisitsineq taaneqartoq ingerlatissagaat, tunngavissaqarluartumik oqallinnissaq pillugu aammalu neriuartumik sillimasiisarfimmik pilersitsisoqassanersoq aalajangiiffigineqarsinnaalerumaartoq.

**Pisortatigut aningaasatigut allaffissornikkullu kingunissai:**

Misissuitsinermut pisortatigut aningaasartuutissat nalilerneqarput 125-250.000 kr. missiliussagai, tassa sulisorineqartussap  $\frac{1}{4}$  -miit  $\frac{1}{2}$ -imut ukiumut nalinga. Naalakkersuisut allamik isumaqassagaluarpata tamanna naalakkersuisunit siullermeerneqarnerani akissummi nassuiaateqarfigineqassasoq piumasarissavarput.

**Namminersortunut aningaasatigut allaffissornikkullu kingunissai:**

Soqanngilaq.

**Innuttaasunut aningaasatigut allaffissornikkullu kingunissai:**

Soqanngilaq.